

一日一夜不習歌舞戲樂亦不著文飾香熏
 塗身如是修行聖八關齋於是八關齋中功
 德不可限量言有爾所福爾所功德爾所福
 報如是衆多福不可稱計諸比丘譬如五大
 流水皆同一處所謂恒伽娑婆奴新頭河脂
 耶婆提摩棄彼水所流處不可限量言有爾
 所水有爾所瓶水有爾所千瓶百千瓶水如
 是聖八關齋福不可稱量言有爾所福爾所
 功德爾所果報此大福不可稱計爾時諸比
 丘聞佛所說歡喜奉行

八關齋經

孝子經

失

譯

人

名

佛問諸沙門親之生子懷抱十月身為重病
 臨生之日母危父怖其情難言既生之後推
 燥卧濕精誠之至血化為乳摩飾澡浴衣食

教詔禮賂師友重貢君長子顏和悅親亦欣
豫子設慘戚親心焦枯出門愛念入則存之
心懷惕惕懼其不善親恩若此當何以報諸
沙門對曰唯當盡禮慈心供養以賽親恩耳
世尊又曰子之養親甘露百味以恣其口天
樂衆音以娛其耳名衣上服光耀其體兩肩
荷負周流四海訖子年命以賽恩養可謂孝
乎諸沙門曰唯孝之大莫尚乎茲世尊告曰
未爲孝矣若親頑闇不奉三尊兇虐殘戾濫
竊非物情染外色僞辭非道耽醉荒亂違背

正真兇孽若斯子當極諫以啓悟之若猶瞢
瞢未悟卽爲開化牽譬引類示王者之牢獄
諸囚之刑戮曰斯爲不軌身被邪毒自招殞
命命終神去繫于太山湯火萬毒獨喚無救
由彼履惡遭此重殃若復未移悲泣啼號絕
不飲食親雖不明必以恩愛之痛懼子死矣
由當強忍伏心崇正道若親遷志奉佛五戒
仁惻不殺清讓不盜貞潔不淫守信不欺孝
順不醉宗門之內卽親慈子孝夫正婦貞九
族和睦僕使恭順潤澤遠被舍血受恩十方

諸佛天龍鬼神有道之君忠平之臣黎庶萬
姓無不敬愛祐而安之雖有顛倒之政佞孽
之輔兇兒妖婦千邪萬怪無如已何於是二
親處世常安壽終魂靈昇生天上諸佛共會
得聞法言獲道度世長與苦別佛告諸沙門
觀世無孝唯斯為孝耳能令二親去惡為善
奉持五戒執三自歸朝奉而暮終者恩重於
親乳哺之養無量之惠若不能以三尊之至
化其親者雖為孝養猶不孝矣無以孽妻遠
賢不親女情多欲好色無倦違孝殺親國政

荒亂萬民流亡本志惠施以戒自檢輒心崇
仁蒸蒸進德潛意寂寞學志叡達名動諸天
明齊賢者自穢妻聚惑志女色荒迷于欲妖
蠱姿態其變萬端薄智之夫淺見之士覩其
如此不覺微漸遂迴志沒身從彼妖媚邪巧
之辭或危親殺君恡色情蕩忿嫉怠慢散心
盲瞋等行鳥獸自古世來無不由之亡身滅
宗是以沙門獨而不雙清潔其志唯道是務
奉此明戒為君即保四海為臣即忠以仁養
民父法明子孝慈夫信婦貞優婆塞優婆夷

執行如此世世逢佛見法得道佛說如是弟子歡喜

孝子經

黑氏梵志經

吳月支國優婆塞 支謙 譯

聞如是一時佛遊尼連河水邊在彼一月造十八變化於迦葉兄弟三人及千弟子轉遊行羅閱祇城止頓一年教授國民爲其講法

初成佛道竟二年已乃到舍衛興隆道化開度天人世間人民時香山有梵志名曰迦羅得備四禪具足五通徹視洞聽身能飛行自察心念知人來生講說經義感動釋梵及四天王諸鬼神龍并閻羅王悉往聽之言語雅妙聲和猶梵日日諮受不以爲懈音徹于遠普來歸德時閻羅王坐聞經法淚下如雨舉目觀視益用悲歎于時梵志問閻羅王何爲悲泣淚下如雨閻羅答曰事當歸實不可虛言仁今說經辯辭利口義理甚妙猶如蓮華